

Pirro THOMO

SHPËRNDARJA KOHORE DHE TERRITORIALE E ARKITEKTURËS PASBIZANTINE NË SHQIPËRI

Pushtimi osman i shek. XV i dha fund periudhës rreth 10-shekullore bizantine me arritje të rëndësishme në fushën e arkitekturës dhe të artit. Arkitektura pasbizantine që pasoi, ndonëse trashëgoi nga periudha pararendëse një sërë principesh dhe tiparesh, nuk mund të quhet një pasuese e thjeshtë e saj. E zhvilluar në një periudhë me përmbajtje krejt të ndryshme historike, ajo pa dyshim formoi tiparet e veta specifike, që e bëjnë të konsiderohet si një fushë e veçantë dhe me interes studimi.

Nga kjo periudhë kanë arritur deri në ditët tona një numër i madh monumentesh, kryesisht në Shqipërinë e Jugut, ku u ruajt feja orthodhokse, të cilat përfaqësojnë të gjithë tipat dhe variantet, të shtrira gjatë gjithë kësaj periudhe.

Në këto krahina, gjatë periudhës bizantine pati një zhvillim të madh ndërtimi i tempujve kristianë. Për periudhën e parë, shek. IV - VII, gërmimet arkeologjike kanë nxjerrë në dritë një numër të madh monumentesh. Gjatë kësaj periudhe një përhapje të madhe patën bazilikat trenefëshe (Elbasan, Amantia, Butrint, Bylis, Ballsh, Finiq, Sarandë, Arapaj etj.), bazilikat njëfenëshe (Antigone, Durrës, Apoloni, Butrint etj.), si dhe kishat me plan rrethor dhe ato trikonkëshe (Butrint, Lin).

Duke filluar nga shek. X, vërehet një gjallërim i veprimtarisë ndërtimore të ndërtesave fetare, çka shfaqet si në numrin e tyre, ashtu dhe në repertorin tipologjik të përdorur. Ngrihen kisha njëfenëshe, vazhdojnë për traditë bazilikat (Perondi, Labovë, Mesopotam etj.) dhe, ndërkohë, kemi futjen e tipit të ri të ndërtimeve kishtare, atij në formë kryqi me kupolë (Kosinë, Apoloni, Berat, Mborje etj.).

Siç duket nga kjo paraqitje e shpejtë e monumenteve të ruajtura deri në ditët tona, arkitektura bizantine njohu nivele të larta zhvillimi. Por pushtimi osman i vendit e ndërpreu këtë zhvillim. Gjatë shekullit të parë pas pushtimit e deri më sot nuk kemi të dokumentuar ndonjë kishë.

Duke filluar nga shek. XVI, shkallë-shkallë fillon të rigjallërohet veprimtaria ndërtimore për ngritjen e ndërtesave të kultit të krishterë, jo vetëm në qytete, por edhe në fshatra.

Nga ana tipologjike dallojmë kishat njënefëshe: kishat në formë kryqi me kupolë dhe bazilikat trenefëshe. Secila prej tyre shfaqet me një sërë variantesh përsa i përket organizimit të hapësirës së brendshme dhe zgjidhjes konstruktive.

Tipi i parë përfshin kishat me çati druri, kishat e mbuluara me qemerë, kishat, hapësira e brendshme e të cilave fiton një theksim vertikal ndërmjet mbulimit të pjesës qendrore me kupolë, dhe kishat me çati në formë kryqi.

Kishat njënefëshe me çati përfaqësojnë variantin më të thjeshtë dhe patën një përhapje të gjerë në të gjitha krahinat dhe në gjithë periudhën. Karakteristikat kryesore të tyre janë: përmasat e vogla, thjeshtësia e hapësirës së brendshme dhe trajtimi i varfër arkitektoniko-dekorativ. Të tilla janë kishat e para të periudhës pasbizantine: Leshnicë e Sipërme, Peca, Poliçan, Tremishtë etj.

Zgjidhjet më të thjeshta në kishat njënefëshe të mbuluara me qemerë janë atëherë kur hapësira e brendshme mbulohet me një qemer të pandërprerë gjysmëcilindrik (Jorgucat, Vithkuq). Ky uniformitet thyhet kur në muret gjatësore dalin pilastra, të lidhur ndërmjet tyre me harqe (Dhrovjan, Peca, Dervişan).

Parimi kompozicional i kishave njënefëshe me kupolë është krijimi i bërthamave të pavarura, nga të cilat ajo qendrore diferencohet nga mbulimi i saj me kupolë mbi ose pa tambur (Vithkuq, Barmash, Çatistë, Dhivri, Dema).

Karakteristike e kishave njënefëshe me çati në formë kryqi është ndërprerja e qemerit gjatësor me një qemer tërthor më të lartë se i pari dhe pasqyrimi i kësaj strukture në pamjen e jashtme (Çatistë, Kardhikaq).

Tipi i dytë, ai në formë kryqi me kupolë, ndeshet kryesisht në manastiret. Ndonëse përsa i përket kompozimit të hapësirës së brendshme paraqitet më i unifikuar, edhe këtu mund të dallojmë dy variante: kishat me një apsidë dhe kishat me apsida anësore, ose tipi i Malit të Shenjtë.

Kriteri kompozicional i hapësirës së brendshme të kishave në formë kryqi me kupolë është i njëjtë me atë të kishave bizantine të të njëjtit tip: katër kolona të brendshme krijojnë bërthamën qendrore të mbuluar me kupolë mbi tambur, që ngrihet mbi katër krahët e kryqit, të mbuluara me qemerë cilindrikë. Përgjithësisht, kishat e këtij tipi janë të variantit të thjeshtë, d.m.th. me katër kolona. Por takohen dhe shembuj, kompozimi planimetrik i të cilëve është i përbërë, d.m.th. me ambientin e altarit të veçuar nga bërthama në formë kryqi (Voskopojë, Dhuvjan).

Kishat pasbizantine në formë kryqi me kupolë karakterizohen nga forma e zgjatur në plan, duke theksuar së tepërmi aksin gjatësor të ndërtesës. Prania e apsidave anësore e thyen këtë formë gjatësore dhe thekson në plan formën e kryqit. Struktura e brendshme nuk pasqyrohet tërësisht në kompozimin volumor të jashtëm. Në rastin më të mirë, në pamjen e jashtme është i dallueshem volumi i nefit tërthor, ndërsa ambi-

entet këndore janë të përfshira nga çatia dyujëse e nefit gjatësor (Zervat, Dhuvjan, Vanishtë, Derviçan, Kakome etj.). Në raste të tjera struktura e brendshme është e fshehur tërësisht nga një çati e vetme dyujëse, e cila ndërpritet vetëm në pjesën qendrore nga tamburi, që mban kupolën (Koshovicë, Krorëz, Qeparo).

Me shumë variante paraqitet tipi i tretë, siç janë bazilikat me kupolë, bazilikat e mbuluara me një sistem harqesh dhe qemerësh, si dhe bazilikat me çati të rrafshët.

Bazilikat me kupolë dallohen nga kishat në formë kryqi me kupolë nga numri më i madh se katër i kolonave, nga ndarja e qartë e nefeve gjatësore dhe, shpeshherë, nga mungesa e nefit tërthor. Në disa shembuj nefet gjatësore ndërpriten nga një nef tërthor, i cili shfaqet edhe në pamjet e jashtme (Vithkuq, Kolkondas). Në kisha të tjera mungon nefi tërthor (Leusë, Nivan, Lukovë, Vllahogoranxi).

Në bazilikat e mbuluara me një sistem qemerësh shfaqet një larmi e madhe e mbulesës së hapësirës së brendshme. Zgjidhja më e thjeshtë është atëherë kur secili nga nefet gjatësore mbulohet nga një qemer i pandërprerë (Lipë, Gjirakastër). Por zakonisht kolonat lidhen ndërmjet tyre dhe me muret perimetrale me harqe, duke krijuar një sërë bërthamash të mbuluara në mënyra të ndryshme (Skore, Topovë, Përmet etj.). Kompozime më të përbëra kemi në Vithkuq, Sopik etj., ndërsa në Voskopojë dhe Berat kolonat janë grupuar katër nga katër, duke dhënë përshtypjen e ndërprerjes së dy bërthamave në formë kryqi me kupolë.

Bazilikat e mbuluara me tavan të rrafshët e kanë organizimin e hapësirës së brendshme më të thjeshtë. Nefet zakonisht mbulohen me tavane në të njëjtin nivel (kishat e Myzeqesë), por ka dhe raste kur nefi qendror ngrihet mbi dy nefet anësore (Voskopojë, Karavasta).

Si shtrirje kohore, arkitektura pasbizantine mbulon një periudhë katërshekullore, duke filluar nga shek. XIV dhe duke mbaruar në shek. XIX. Por dëndësia e ndërtimit të kishave nuk është e njëjtë në shekuj të ndryshëm. Pas një shekulli ndërprerjeje pas pushtimit osman, ndërtimi i kishave rifillon në shek. XVI. Veprimtaria ndërtimore rritet në shek. XVII, arrin kulmin në shek. XVIII dhe pakësohet në shek. XIX.

Në shek. XVI (Tab. I) ka qenë karakteristik ndërtimi i kishave të vogla njënefëshe me çati druri (Leshnicë e Sipërme (1525), Poliçan (1526) etj.), si dhe rindërtimi i kishave të vjetra të rrënuara të periudhës paraardhëse. (Shën Kolli në Shelcan (1554), Shën Kolli në Kurjan (1570), Shën Todri dhe Shën Maria e Vllahernës (1578), në kalanë e Beratit etj.). Por, krahas tyre dhe kryesisht në manastire, ndërtohen dhe kisha të varianteve të zhvilluara, siç janë kishat njënefëshe me qemerë (Jorgucat, 1585), kishat me çati në formë kryqi (Çatistë, 1584), si dhe kishat në forme kryqi me kupolë (Zervat, 1569; Vanishtë, 1582; Dhuvjan, 1588; Kameno, 1580 etj.), si dhe bazilika me kupolë (Poliçan, 1513).

Shekulli XVII (Tab. II, III) shënon një rritje jo vetem sasiore të kishave të ndërtuara, por edhe një rritje të repertorit tipologjik të përdorur. Kishat mbizotëruese të këtij shekulli ishin ato njënefëshe të varianteve të zhvilluara (Barmash, 1616; Shales, Vithkuq, Dema, Dhivri), kishat në formë kryqi me kupolë (Stegopul, 1624; Saraqinisht, 1630; Voskopojë, 1632; Kakome, 1672; Krorëz, 1672,), si dhe shtohen ndërtimet bazilikale (Vllahogoranxi, 1612; Piqeras, 1672 etj.).

Në shek. XVIII (Tab. IV, V, VI) vërehet një dukuri e re në ndërtimin e kishave. Numri i tyre rritet në mënyrë të konsiderueshme, ndërsa ndërtimi i manastireve të reja thuajse ndërpritet, por zmadhohen, plotësohen dhe pasurohen me ndërtime të reja ato ekzistueset. Si tip mbizotërues gjatë këtij shekulli bëhet bazilika me të gjitha variantet e saj: bazilika me kupolë (Nivan, 1702; Vithkuq, 1759; Berat etj.), bazilika të mbuluar me një sistem qemerësh (Voskopojë, Përmet, Sopik, Topovë dhe shumë të tjera), bazilikat me tavan të rrafshët (Voskopojë, 1751; bazilikat e Myzeqesë etj.) Kishat e këtij shekulli dallohen nga përmasat e mëdha dhe nga trajtimi i kujdesshëm arkitektonik. Por, krahas tyre, takohen dhe kisha të vogla e të thjeshta njënefëshe me çati druri, të cilat shërbenin kryesisht si faltore lagjesh si në qytete, ashtu dhe në fshatra.

Edhe kishat e shek. XIX dallohen për përmasat e mëdha dhe nivelin e lartë të teknikës së ndërtimit, por në aspektin tipologjik ato nuk sollën diçka të re. Me përjashtim të kishave të Myzeqesë, të cilat në të vërtetë u formuan si variant i veçantë që në shek. XVIII, kishat e tjera përsërisin tiparet tipologjike të formuara në shekujt paraardhës (Leusë, 1812; Kolkondas, 1812-13; bazilika me kupolë).

Përsa i përket shpërndarjes territoriale të tipologjisë, paraqitet kjo tablo: kishat njënefëshe me çati druri patën një përhapje në të gjitha krahinat dhe në të gjitha periudhat; kishat njënefëshe me mbulesa qemerësh e kupolash takohen njëlloj në krahinat e Korçës, Gjirokastrës e Sarandës; kishat në formë kryqi me kupolë janë thuajse të gjitha kisha manastireshe; së fundi, bazilikat gjenden të shpërndara njëtrajtësisht në të gjitha krahinat.

Shqyrtimi i mëtejshëm i kësaj shpërndarje nxjerr në dukje se krahinat e ndryshme paraqesin dallime e deri parapëlqime për tipa e varinte të caktuara. Në rajonin e Gjirokastrës dhe të Sarandës mbizotërojnë kishat me mbulesa të kurbëzuara të hapësirës së brendshme dhe, ndërmjet tyre, ato me theksim qendror. Por midis këtyre krahinave vërehen dhe ndryshime në tipare të veçanta. Kështu, kishat në formë kryqi me kupolë në krahinat e Sarandës dhe, sidomos ato të Bregdetit, dallohen për pamjen e tyre bazilikale më të theksuar nga jashtë. Në krahinat e Korçës vërehet një mbizotërim i kishave me struktura të kurbëzuara, ndër të cilat ndërtimet bazilikale përbëjnë tipin mbizotërues. Ndryshe nga rajonet e mësipërme, në rajonin e Beratit kishat me mbulesa të kurbëzuara janë shumë të rralla. Mbizotëruese bëhen bazilikat me mbulesa të rrafshëta sidomos në krahinën e Myzeqesë.


E parë në raport me periudhën pararendëse, arkitektura pasbizantine, krahas lidhjeve të forta, dallohet dhe për tiparet e veta specifike. Ndryshimi ndërmjet periudhave duket, së pari, në radhën e shfaqjes së tipave. Ndërsa në arkitekturën bizantine tipi bazilikal ishte karakteristik kryesisht për periudhën e hershme të saj dhe tipi në formë kryqi me kupolë u bë mbizotërues në periudhat më të vona, në arkitekturën pasbizantine kishat në formë kryqi me kupolë janë karakteristike për shekujt XVI - XVII, ndërsa zhvillimi i tyre mbyllet me bazilikat. Edhe vetë tipat dhe variantet e përdorura nga arkitektura pasbizantine, ndonëse të njohura më parë se kjo, nuk ishin imitime të prototipave bizantinë.

Le të marrim për krahasim tipin në formë kryqi me kupolë. Kishat pasbizantine të këtij tipi, ndryshe nga ato bizantinët, kanë në plan një formë katërkëndëshi të zgjatur, çka sjell dhe pabarazinë e krahëve të kryqit. Kjo formë e zgjatur ka ndikuar dhe në organizimin e hapësirës së brendshme, ku aksi gjatësor shpesh mbizotëron mbi atë vertikal, që ishte tipar dallues i hapësirës së brendshme bizantine. Dallimet ndërmjet dy periudhave shtyhen deri dhe në kompozimin e jashtëm volumor. Kishat pasbizantine nuk e kanë atë kompozimin e shkallëzuar dhe piramidal karakteristik të kishave të periudhës bizantine, ku çdo vëllim është i formuar dhe i diferencuar qartë, duke pasqyruar njëkohësisht edhe organizimin e hapësirës së brendshme. Fshehja e pjesshme ose e plotë e strukturës së brendshme që vumë në dukje më sipër, u jep kishave pasbizantine një shtrirje në gjatësi, që e thekson edhe më tepër aspektin bazilikal të tyre.


Të tilla dallime mund të vërehen edhe në tipat e variantet e tjera. Kështu, p.sh., edhe në bazilikat e mbuluara me një sistem qemerësh, ky sistem i larmishëm dhe dinamik është i fshehur nga çatia. Në mënyrë të veçantë në bazilikat e Voskopojës, ku u arrit shkalla më e lartë e zhvillimit të arkitekturës pasbizantine, duhet të hysh brenda që ta rrokësh dhe ta ndiesh gjithë madhësitinë e hapësirës, që hapet përpara teje.

Analiza tipologjike dhe morfologjike e mësipërme na lejon të pohojmë se arkitektura pasbizantine, megjithëse trashëgoi shumë principe figurative dhe konstruktive bizantine, prapëseprapë njohu një interpretim më të lirë të tipave dhe të varianteve, një përpunim të tyre sipas kushteve të reja historike, duke shënuar një periudhë të veçantë arkitektonike me tiparet e veta dhe me rrugën e vet të zhvillimit.


Tab. I



Tab. II



Tab. III



Tab. IV

